

Evening Dogri News Bulletin, 18 May. 2026

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. उपराज्यपाल मनोज सिन्हा होरें श्रीनगर दे पंथा चैक च श्री अमरनाथ जात्तरा गितै तैयारिएं दा जायजा लैता।
2. जम्मू-कश्मीर सरकारै 6में ते 7में तनखाह कमीशनें तैहत मलाजमें ते पेंशनरें दा डी.ए बधाने दी घोशणा कीती ऐ।
3. मुखमंत्री उमर अब्दुल्ला होरें सांसद इंजीनियर रशीद ते विधायक खुर्शीद अहमद हुंदे पिता दी मौती पर दुख प्रगट कीता ऐ।
4. बिहार विधानसभा दी अल्पसंख्यकें सरबंधी कमेटी नै अज्ज मंत्री सकीना इत्तू ते मुखमंत्री हुंदे सलाहकार नासिर असलम वाणी हुंदे कन्नै मलाटी कीती ते जम्मू-कश्मीर ते बिहार च विकास स्थिति बारै गल्लबात कीती।
5. मौसम विभाग नै जम्मू च अगले 24 घंटे दरान मती गर्मी पौने दी पेशनगोई कीती ऐ।

<><><><><><>

LG-Amarnath

उपराज्यपाल मनोज सिन्हा होरें श्री अमरनाथ श्राइन बोर्ड यात्री निवास पंथा चैक थाह चला'रदे कम्मै दा जायजा लैता। उनें चला'रदे निर्माण कम्म ते इंतजामें दा जायजा लैता। इस मौके पर उपराज्यपाल होरें ढांचागत विकास, रिहायश, साफ-सफाई ते होर दुई जरूरी सुविधाएं दी प्रगति दा निरीक्षण कीता। उनें अफसरें गी

हिदायत कीती जे ओहू बकाया कम्मै गी तेजिया कन्नै सबूरा करन। उनें कम्मै दे म्यार बनाई रखने ते श्रद्धालुएं लेई सुरक्षित, अरामदायक ते सुविधाजनक रिहायश उपलब्ध करोआने दे बी निर्देश दित्ते।

<><><><><><>

Ramban-VDG

श्री अमरनाथ जात्तरा-2026 थमां पैहले सेना आसेआ रामबन जिले च विलेज डिफेंस ग्रुप्स लेई सिखलाई कार्यक्रम दा सरिस्ता कीता गेआ। एहदा मकसद मुकामी सुरक्षा तैयारिएं ते यात्रा रस्ते पर बसनीकें दा तालमेल ते सहयोग यकीनी बनाना हा। आकाशवाणी जम्मू संवाददाता दी रिपोर्ट मूजब इस जल्ल दरान ध्यान यात्रा दरान चौकसी, आपात स्थिति दरान प्रक्रिया ते लोकें दा आपूं'चै तालमेल बदाना ऐ तां जे यात्रा गी सुरक्षित ते सुचारू ढंग्गै सिर करोआया जाई सकै। इस जतन दा मकसद सुरक्षाबलें ते मुकामी समुदाय बश्कार तालमेल बदाना ऐ।

<><><><><><>

JK-Govt. DA

जम्मू-कश्मीर सरकारै अपने मलाजमें ते पेंशनरें लेई महंगाई भत्ता बधाने दी घोशणा करी दित्ती ऐ। 7में तनखाह कमीशन तैहत डी.ए 58 प्रतिशत शा बदाइयै 60 प्रतिशत करी दित्ता ऐ जेहडा पैहली जनवरी 2026 थमां लागू होग जिसलै जे 6में तनखाह कमीशन तैहत दे मलाजमें लेई बादा 257 प्रतिशत कोला बधाइयै 262 प्रतिशत करी दित्ता गेआ ऐ आकाशवाणी दे जम्मू संवाददाता नै जानकारी दित्ती ऐ जे वित्त विभाग नै इस बारै बक्खरे-बक्खरे आर्डर जारी कीते न। नमें सिरेआ तैह महंगाई भत्ता मई 2026 थमां लेइये तनखाई च दित्ता जाहग जिसलै कि जनवरी कोला लेइयै अप्रैल धोड़ी दे बकाए जनरल प्रोविडेंट फंड च जां फही नकद, जियां बी लागू होग दित्ते जाडन।

<><><><><><>

CM-Condolence

मुख्यमंत्री उमर अब्दुल्ला होर मिम्बर पार्लियामेंट इंजीनियर रशीद ते विधायक खुर्शीद अहमद शेख हुंदे पिता खजीर मोहम्मद शेख हुंदी मौती पर गैहरा दुख प्रगट कीता ऐ। उंदा लम्मी बमारी दे बाद एम्स दिल्ली च काल होई गेआ। ओह 85एं बरें दे हे। मुख्यमंत्री होरें सौगी परिवार कन्नै दिली हमर्दी प्रगट करदे होई दिवंगत आत्मा दी शांति लेई प्रार्थना कीती ऐ। उनें प्रार्थना कीती जे ईश्वर परिवार गी कदें नेई पुरे जाई सकने आहले नुकसान गी जरने दी हिम्मत देयै।

<><><><><><>

International Museum

अजैबघर सरबंधी अंतरराष्ट्री ध्याड़े दे मौके पर संस्कृति मैहकमे नै मुबारकमंडी अजैबघर च इक विशेष कार्यक्रम दा सरिस्ता कीता गेआ। एह कार्यक्रम पुरातत्व ते अजैबघरें सरबंधी निदेशालय दे बैनर हेठ कीता गेआं बक्ख-बक्ख स्कूलें दे विद्यार्थिं एहदे च बदी चढियै हिस्सा लैता।

<><><><><><>

Bihar-Delegation

बिहार विधानसभा दी अल्पसंख्यकें दे कल्याण सरबंधी कमेटी जेदी अगुवाई ओहदे अध्यक्ष अखतार उल ईमान होर करा'रदे हे, होरें सेहत ते मेडिकल शिक्षा मंत्री सकीना इतू ते मुख्यमंत्री हुंदे सलाहकार नासिर असलम वाणी हुंदे कन्नै मलाटी कीती। बैठक दरान बिहार ते जम्मू-कश्मीर दे विकास सरबंधी परिदृश्य बारै चर्चा कीती। इस दरान मुख ध्यान कल्याणकारी स्कीमें, सेहत सरबंधी दिक्खभाल, शिक्षा ते अल्पसंख्यकें सरबंधी मामलें पर दित्ता गेआ। आपसी हित आहले मामलें, आपसी सहयोग गी मजबूत करने बारै चर्चा होई। दौरें पर आए दे डेलीगेशन नै विकास सरबंधी जत्तें ते सरकार आसेआ अपनाए गेदे तौर-तरीकें पर चर्चा होई।

<><><><><><>

Mission Yuva Ramban

रामबन जिले च मती तरजीह आहले उद्यमता सरबंधी फ्लैगशिप कार्यक्रम मिशन युवा तैहत हासल प्रगति दा जायजा लैने लेई विजनेस हैल्प डेस्क दी जायजा मीटिंग लग्गी। मिशन युवा दा मकसद नौजवानें च स्वरोजगार लेई दिलचस्पी पैदा करना ते उनेंगी दोआर-कर्जे, रियायत सब्सिडी ते इस चाल्ली दियां होर सुविधां उपलब्ध कराइयां जंदियां न तां जे ओहू अपना कम्मकाज शुरू करी सकन। इस स्कीम तैहत छमता निर्माण सिखलाई, बपार प्रबंधन, नमिएं काहडें ते स्हाब लेखें बारै जानकारी ते सिखलाई बक्खी चेचा ध्यान दित्ता जंदा ऐ जेह्दे नै नौजवानें गी काफी मदाद ते समर्थन थ्होंदा ऐ। बैठक दरान अधिकारिएं जिले च एहदी अमलावरी ते प्रगति दी तफसीली जानकारी हासल कीती।



Prog. Announcement

आकाशवाणी जम्मू दे प्रादेशिक समाचर एकांश आसेया आतंकवाद रोधी दिवस दे सरबंधै च 21 मई गी 25एं मिन्टें दा इक विशेष कार्यक्रम प्रसारित कीता जाहग, जेदा विषे होग- “एकता, शांति ते आतंकवाद गी दना बी नेई बर्दाश्त करना”। इस कार्यक्रम च स्हाडे परोहने होगंन, Brig. Retire Rajan Jamwal, जेह्डे इस विशे पर अपने माहिराना विचार सांझे करगंन। इस कार्यक्रम दी मेजबानी साहडे न्यूज एंकर जगमोहन शर्मा आसेया कीती जाग।



Weather

मौसम विभाग श्रीनगर दे निदेशक मुख्तार अहमद होरें जम्मू खित्ते च अगले 24 घंटे दरान गर्म ब्हाऽ चलने दी पेशगोई कीती ऐ। मैदानी इलाके च मौसम खुशक ते गर्म बने दा रौह्ग। उनें आखेआ जे जम्मू खित्ते च तापमान केई सारी थाहें पर दिनें 2 थमां 4 डिग्री सेल्यिस तगर बदी सकदा ऐ। इस्सै दरान कश्मीर च मौसम आमतौर पर गर्म ते खुशक रौह्ग। उनें आखेआ जे दपैहरी मगरा धूड आहली अंधी चली सकदी ऐ।



U-20 Football

तोआई, जम्मू-कश्मीर दे 20एं ब'रें कोला हेठली उम्मी दी फुटबाल टीम नै अंडमान निकोबार गी 5-0 कन्नै हराइयै स्वामी विवेकानंद अंडर-20 फुटबाल चैंपियनशिप च उप्परोतली द'ऊं जित्तां अपने नां कीतियां ना। जम्मू-कश्मीर दी तरफा रिजवान, अब्दुल साहला ते रिहान अशरफ नै गोल कीते ते मकाबले दरान अनुशासन, इकजुटता ते तालमेल दा शानदार प्रदर्शन कीता। युवा सेवाएं ते खेड्डें सरबन्धी कमीशनर सैकरेटरी डा. शाहिद इकबाल चौधरी होरें सभनें खडारिणं ते कोचिंग स्टाफ गी मुबारकबाद दिती ऐ जिंदे जत्तें कन्नै खित्ते दी खेड्डु प्रतिभा च निखर आवा करदा ऐ ते स्हाड़े खडारी बक्ख-बक्ख मकाबलें च अपना ना करदा करदे ना। टीम नै राश्ट्री स्तरै पर अपना शानदार प्रदर्शन जारी रक्खे दा ऐ।

